



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 7

Party nungja melentsütsü atema EC  
dak tashi mali: Uddhav Thackeray

West Africa bloc mendenpuba  
inyaktsü Nigeria Tir Tinubu shimogo



VOL. XX NO. 268 (ADOK 268) DIMAPUR SANGTENNÜ (TUESDAY)

CHITENI (JULY) 11, 2023

₹ 5.00

## Supreme Court ajanga Manipur tensa tamajungba mekümdaktsütsü

New Delhi, July 10, 2023

(Agencies): Manipur nung tensa tamajungba kümdaktsütsü atema Supreme Court ya sabang ka ama mamshitsüla aser SC-i law & order meinyaktetsü ta Hombarnü Chief Justice DY Chandrachud aser Justice PS Narasimha na adenba bench kati metetdaksü.

SC-i tensa tajungba kümdaktsütsü atema ketdangsürtem nem tetuyuba agütsütsü akok aser iba atema telok balala teyari den tebilemba tajungtem nungdaker ta SC bench-isa ashi.

"Mongulbar tashi nung tensa tajungba akümtsü atema onok nem tebilemba tajungtem agüjang aser onoki Centre aser Manipur sorkar dang item mapa inyaktsü ashitsü" ta bench-isa ashi.

SC-isa Manipur sorkar atema okatsür Solicitor General Tushar Mehta dang state sorkari June ita sangdong agütsüba atema mapa inyaktsü tetuyuba agütsü. Iba sangdong nung sorkar mapa inyakertem mapai arutsü mesüra itasen katitsü indang shia lir.

July 3, 2023 nü SC-i Manipur

## Churachandpur nung bank ka nungi Rs 1.5 crore auya

Imphal, July 10, 2023

(Agencies): Manipur nung tensa mejungi aruba mapang ka nung nisung kari Churachandpur nung aliba bank ka nungi Rs 1.5 crore auyaogo.

Churachandpur district nung Axis Bank ita ana shi shibanga liasü aser iba bank nungi sen den hon osettem auyaba osang angazüker.

Axis Bank indang tesülen tapok ka tupoker aliba nguogo aser iba ajanga auertem bank telungi ai ama bilemer.

Axis Bank indang staff-i ashiba agi branch manager tang mali aser iba jagi auyaba osang tejangja meshiteter.

Külen, Manipur nung tensa mejungi dang lir aser tanü Imphal West-Kangpokpi arrtsülen Phayeng aser Singda yimtsüngtem nung khatepba osang angazüker.

### Governor Uikey-i relief camp semdang

Hombarnü Manipur Governor Anusuiya Uikey-i Kangpokpi district nung relief camps semdang aser Internally Displaced Persons (IDPs) den ajurutepea sensaksem.

Governor Uikey-i Internally Displaced Persons dang kobi melii tensa süngjemtsü ta ashi.

Kangpokpi District Deputy

sorkar dang rehabilitation mapa inyakba, law & order tensa tajungba kümdaktsüba aser prangpong-injang ngutetba indang updated status report ka meshia liasü.

Chief justice of India (CJI) DY Chandrachud-isa ken o benokertem atema okatsür advocate Colin Gonsalves dang "Onok dangi tebilemba tajung bener arung. Nai temulung meleme bilemba nung ajemdaker onoki law & order mapa meinyaktetsü" ta ashi.

"Iba sabang ajanga Manipur nung ozüing alema mapa talila inyaktsüba mesüra tanga khurettem madokdaktsütsüla. Onoki security apparatus mesüra law & order ketdangsüa meinyaker. Nenoki tebilembatem lemsatepra onoki agizüktsü" ta Chandrachud-isa metetdaksü.

"Asenoki iba ya telok o telok tsüingda ken o ka ama mebilemli kechiyong iba ya humanitarian issue ka lir" ta paisa shisem.

"Onoki nenoki bilemba angateta lir saka Supreme Court nung ken o atsütepa jembitsü atema telatet kar lir" ta SC bench-i ashi.

Commissioner-i anir tongti ketdangsürtem aser Committee on Tribal Unity Sadar Hills den tanga civil society organizations-i Governor Uikey meina senzü.

"Nenok anüker ka ama ni nenok tensa rebrangtsü aser khurettem angadangtsü atema aruogo" ta lai IDPs ashi.

"Ni tanga lendenlen lokti lennirtem aser Internally Displaced Persons dena ajurutepogo aser Churachandpur semdangogo. Ni nenok MLA aser Minister tem den ajurutepogo aser parnok nungi nenok takhangbatem angazükogo. Item osang ni Prime Minister, Defence Minister, Home Minister aser India President dangi benogo" ta Governor-i metetdaksü.

"Ni Prime Minister dang kin anaprong nungi lennirtem den jembitsü aser külemi khurettem bentetsü aser tekaratiba nung tensa süngjemdaktsütsü atema shiogo" ta Uikey-isa ashi.

Laisa Motbung Model Village nung Shalom Academy aser Motbung Govt. High School nung lapoka aliba relief camps nung Internally Displaced Persons nem relief materials kar agütsü.

Laisa kaketshirtemi maneni züngtettsü atema yaritsü aser sorkar mapa inyakertem yaritsü nangzük.

## Ao Senden Literature Board anener 'Ao Riju' tenzükogo



Mokokchung, 10th July (TYO): Ao Senden kübok 'Ao Riju' (Ao Academy) tenzükba sentong ka 10th July, 2023 nü Aor Kilem nung kaogo.

Ao kin oshioben aser kaketkeno wazüka ayutsü nükjiding nung Ao Senden Literature Board (ASLB)-i taoba küm ishika jakdang nungi 'Ao Riju' ka tenzüktsüba indang Ao Senden dang tebilemba bendanga liasü, aji oda, iba mapatongji

junger ta Ao Senden-i agizüka 30th June, 2023 nü ASLB to anentsü aser tanü iba riju ya officially tenzükker.

Ao Senden tir, Chubawati Longchar-i jembidang, Ao riju tenzükba ya tongtibangsa Ao oshi aser kaketkeno wazüka ayuba den ibai tensa den apet renloka bener aoba ajanga Ao kin sobaliba wazüka aser kümzüka ayutsü asoshi lir, ta osang zülurtem den jembidang

metetdaksü.

'Ao Riju' ketdangpurtem itemi shimet; tir - Prof. M. Rongsen (Akhoya), tatong tir - Dr. Medem (Mongchen), tongti zülur - S. Wati Ozüküm (Mopungchuket) aser repsem zülur - Dr. Imlirenla Walling (Khensa) aser senotsü zülur - Imlitoshi (Süingratsü). Mapatong balala inyaktsü atema Ao Riju kübok loknu (committee) balala teteta aotsü.

## New Jersey nung Naga American Foundation mungdang among



Dimapur, July 10, 2023 (TYO): July 7 aser 8 anogotem nung Edison, New Jersey, USA nung Naga American Foundation (NAF) indang mungdang mongogo.

Taküm mungdang indang omenji "Embracing Our Roots and Cultivating New Possibilities" liasü. Iba mungdang nung pei indang sobaliba nung tera yanger American sobaliba den liromedema United States nung lokti ka ama liyonga aotsü indang onüktem benoka lemsatep.

Iba mungdang ya küm ana nung khen ayonga amonger aser United States nung alir Naga nunger 90 tema aden.

Taküm mungdang indang host ji Stelton Baptist Church nung head pastor Rev. Dr Louis Ao, pa kinungtsü Aienla aser par kibong liasü. Parnoki chiyungtsü

den mungdang nung nungdakba ajak agütsü.

Külen, tongti o jembirji Fr. Abraham Lotha liasü. Pa ya Transfiguration of the Lord Parish, Highland Park, New Jersey pastor aser Lotha Academy, Nagaland president lir.

Mungdang nungsa Old Cambridge Baptist Church associate pastor Naro Pongen onir ser panel discussion ka liasü aser Fr. Abraham, Christine Kumar (optometrist at DotHouse Community Health Center in Boston, Massachusetts) aser Wati Longchar (manager at Deloitte& Touche in New York, New York) nunger panelist liasü.

Mungdang nung lokti senden ka amendang NAF President Dr Sanyo Konyak-i NAF Secretary inyaktsü atema Dr Kilang Yanger shimba osang metetdaksü. Lai

Justin Aier ket nungi iba mapa melenzüktsü.

Mungdang tembangba sentong nung cultural show aser musical performances liasü aser Ungma Baptist Arogo nung taoba pastor Dr Sanyo. M. Meren-i Naga sobaliba senmang indang video presentation ka sayu.

"Naga nunger dak lokti tashitait kümdaktsütsü sempet lir aser kati ka yariteper. Asenok longjemer NAF mission statement nung America nung aliba Naga nunger longjemtsü mapa meranga inyakdi" ta Dr Sanyo-i ashi.

NAF ya 1991 küm nonprofit organization ka ama tentet. United States nung aliba Naga nunger aser Naga Americans asoshi lokti sentongtem ayonga agiba den educational & cultural maparen inyaka arur.

# Mokokchung nung U-WIN workshop agi



**Dimapur, Chiteni/July 10 (TYO):** Chief Medical Officer's Office indang Conference Hall nung July 10, 2023 nü U-WIN indang district level workshop ka agia liasü. Dr Kibangkumba CMO ajanga iba sentong tenzüka jembidang, iba sentong ya talisa mashisa aliba tetsürtem atema lir aser ibai kanga tongtipang lir, ta ashi aser iba

training of trainers programme agiba ya linük nung Nagaland mezüngbuba lir ta metetdaksü. Iba sentong nung shisalen sayur ya Kingson Kamkara SPO (UNDP), Rajesh K Monsang RPO (UNDP) aser Dr Takosunep DPO (UIP&RCH) nungertem liasü. Iba sentong nung shilem agirtem nem U-WIN indang

nükjidong, guiding principles and expectations, digital system indang tajanzük, case study aser hands on practise aser iba dak sendakba Modules balala indang training agüja liasü. U-WIN ya digital solution platform ka lir, koba ajanga tetsür mashisa, kinü tanur, tanur aser tainlonglong atema vaccination agiba tsüingsü apur.

# Chümoukedima District Planning & Development Board senden menogo

**Dimapur, Chiteni/July 10 (TYO):** Ita shia amenba Chümoukedima District Planning & Development Board (DPDB) senden July 10, 2023 nü DC Office Conference Hall, Chümoukedima nung mendenpula Advisor, Industries & Commerce, Hekani Jakhalu aser ADC Chümoukedima, Dr. Kuzonyi Wideo lenisüba kübok mena liasü.

District asoshi tamendak dak tasen yanglutsü mesüra otsü tasen zülutsü atema nisung ajaki tongti shilem agitet. System melenshitsü aser temelenshi bener arutsü asoshi asenok ya tamendak dak lir, ta Advisor Hekani-i ashi. Anungji sorkar mapa inyaker ajaki anogoshi pei chiyongsü kechi nungi arur iba teraji meteta alitsüla, aser iba teraji metetba sülenbo nendaka inyaktsü aser temelenshi bener arutsü, ta lai ashi. Maneni lai akok tashi district terenlok asoshi ketdangsürtem den yariteptsü nangzük aser team ka ama külemi inyaktsü imlaa atar, ta ashi. Iba senden nung parnoki taoba senden nung Highland Secondary School, Naga United Village nem Grant-in-Aid agütsütsü asoshi onük benokba indang lepa repranga liasü aser verification merenemba ajanga taruba sendeni aben. Chümoukedima District Butcher Union aser Chümoukedima Gorkha Union

society registration atema agizüka liasü. Iba senden nung Nagaland Zoological Park wall lenmang yanglushitsü asoshi EE, PWD (R&B) ajanga onük benok, Chathe ayong ajanga ali metenzüka bener aotsüsa inyaksangshiba osang tejangja EE, Water Resources ajanga aben, leper yanglutsü atema ali agitsü asoshi NTUCT ajanga onük benok, Chümoukedima Town nung lenmang aser kilentzü aoba lenmang yanglushitsü atema NTUCT ajanga onük benok, Seithekema Circle atema Rural Waste Management Plan asoshi EAC, Seithekema ajanga onük benok, DCP Office, Chümoukedima yanglutsü, Ghaspani-II AC atema LADP Fund amala onüktem jembia agizük aser nungdakba mera agitsü asoshi yoka liasü. Kasa senden nung District Industries Centre, Dimapur aser Tourism Office, Dimapur ajanga PowerPoint presentation agüja liasü.

Advisor Hekani-i sentong nung züngsemtem pela agizükba o jembia aser külemi inyaktsü tejangraba lemsatempa liasü. District tasen ka asünung la aser ketdangsürtemi ward müreka ayutsü asoshi lenmang bushitsü maongka lir, ta lai ashi. Ketdangsürtem temelenshi bener arutsü asoshi teimla aser tejangraba tulu nung arua lir, saka tesüiba mapang tenüng aser yimya tamajung aliba ajanga temelenshi bener arutsü tasak akum, saka Chümoukedima ya 'white slate' ka lir, tetetzü ketdangsür temi tamendak dak yangertsü, ta lai ashi.

Advisor Hekani-i sentong nung züngsemtem pela agizükba o jembia aser külemi inyaktsü tejangraba lemsatempa liasü. District tasen ka asünung la aser ketdangsürtemi ward müreka ayutsü asoshi lenmang bushitsü maongka lir, ta lai ashi. Ketdangsürtem temelenshi bener arutsü asoshi teimla aser tejangraba tulu nung arua lir, saka tesüiba mapang tenüng aser yimya tamajung aliba ajanga temelenshi bener arutsü tasak akum, saka Chümoukedima ya 'white slate' ka lir, tetetzü ketdangsür temi tamendak dak yangertsü, ta lai ashi.

# Essay aser Video yangluba tetoktepba nung takok angur nem tetushi agütsü



ADC & ERO Kohima, Rhosietho Nguori aser ketdangsürtem den Essay aser Video yangluba tetoktepba nung takok angurtem Deputy Commissioner, Kohima indang Conference Hall nung July 10, 2023 nü tangokba noksa nung angur.

**Dimapur, Chiteni/July 10 (TYO):** Chief Electoral Officer's Office Nagaland ajanga ayongzükba state level Essay aser Video yangluba tetoktepba nung takok angur nemtenügsang agütsüba sentong ka Deputy Commissioner, Kohima indang

Conference Hall nung July 10, 2023 nü agia liasü. Iba tetoktepba ya "My Opinion on Election in Nagaland" omen nung ajemdaker agia liasü. Kohima district kübok school aser college balala nungi takok angur nisung 17 nem

ADC & ERO Kohima, Rhosietho Nguori aser EAC Hq. & SVEEP Nodal Officer, Kohima District, Limakumla Ozukum nati senpet den kulüzüng kaket agüja liasü. Iba sentong nung menden Olivi Thurr, Assistant Election Officer, Kohima liasü.

# AND & DGDU lokti senden ayonger

**Dimapur, Chiteni/July 10 (TYO):** All Nagaland Directorate & District Government Drivers Union (AND & DGDU) pur 27 buba lokti senden July 22, 2023 nü Nagaland Contractors & Suppliers Union (NCSU) indang Conference Hall, PWD

Junction, Kohima nung anepdang 10:00 ako nungi amentsü, ta AND & DGDU sangdong ka ajanga ashi. Anungji züngsem ajaki tashi angatepa iba senden nung medema arua adentsü ayongzük, ta sangdong ajangasa ashi.

# Assam Rifles temi NH 129A nung anentsüh nungdoktsü



**Dimapur, Chiteni/July 10 (TYO):** Peren-Maram Road nung aliba National Highway 129A nung anentsüh alua aliba jana Assam Rifles temi kanga kera indokja liasü. Assam Rifles temi iba tesem mürekba kisung masü saka construction company ka den mapang shidak nung lenmang nokdanga aliba agientsü asoshi osangtsüsang agitepa liasü. July 10, 2023 anepdang 5:00 ako meta teti ama patrolling aodang Nagaland-Manipur Interstate Border indang Police Check Post aser Iron Bridge tsüingta anentsüh aluba ajanga

lenmang nungbanga aliba angu. Lenmang ya meter 200 shi anentsüh ajanga nembanger liasü, aser ibaji ajanga senzüsemponger temi timtem ajurutsü ajiteta Mayasheel construction company dang teyari meshia liasü. Telok ana lungjemer mapang shidak nung iba mera ahgiba ajanga ghonda ana ser minute 30 tsüingta NH-129A nung anentsüh ya okdok aser anepdang 7:30 ako nungibo gari akhi ama jaja liasü. Iba mapang Assam Rifles temi nungdakba hadir amer long aser molushi indoka liasü.

Assam Rifles temi iba tesem mürekba kisung masü saka construction company ka den mapang shidak nung lenmang nokdanga aliba agientsü asoshi osangtsüsang agitepa liasü. July 10, 2023 anepdang 5:00 ako meta teti ama patrolling aodang Nagaland-Manipur Interstate Border indang Police Check Post aser Iron Bridge tsüingta anentsüh aluba ajanga



India tenüng nung World Choir Games, Gangneung nung shilem agitsü atema Honibarnü Nagaland Chamber Choir state yutsür South Korea-i ogo. Parnoki iba sentong nung July 10 & 11, 2023 anogotem shilem agitsü. Maneni July 13, 2023 nü iba sentong shibangba nunga parnoki shilem agitsü.

# SUP amshir asoshi temerenshi agütsütsü pangjemshi

**Dimapur, Chiteni/July 10 (TYO):** Single Use Plastics (SUP) nokdanga mapa kuma inyaka aotsü asoshi District Task Force aser flying squad team telungjem senden ka Deputy Commissioner, Kohima indang Conference Hall nung July 7, 2023 nü mena liasü.

tanaben aibelener dang senchi sen 10,000 aser tasemben aibelener dang senchi sen 20,000 achitsü telemtetba agia liasü. Kohima Municipal Council dang Kohima kübok SUP amshiba nung tenokdanga agütsüba tali akangshitsü aser paper carry bags amshitsü ajungshia liasü. Sub-division tem dang nüburtem nem angatetdaksütsü asoshi awareness sentong ayongzüktsü aser SUP mamshitsü ajungshia mera agitsü ashi. Wholesale market nung shishilempar aser printing press nung flex banner menüingba tali meita aotsü senden nung telemtetba agi.

Iba senden nung sorkar office nung tajemtsü tzü aliba bottle amshiba indang tatsü-talang jembia aser sorkari totuyuba agütsüba ama Kohima district kübok sorkar offices aser sorkar sentong aser senden nung tajemtsü tzü bottle litre 20 tekübok mamshitsü tenokdanga agüja aliba mapa kuma inyaktsü telemtetba agia liasü. Iba senden nungsa mezüng aibelener dang senchi sen 5,000,

Iba senden nung sorkar office nung tajemtsü tzü aliba bottle amshiba indang tatsü-talang jembia aser sorkari totuyuba agütsüba ama Kohima district kübok sorkar offices aser sorkar sentong aser senden nung tajemtsü tzü bottle litre 20 tekübok mamshitsü tenokdanga agüja aliba mapa kuma inyaktsü telemtetba agia liasü. Iba senden nungsa mezüng aibelener dang senchi sen 5,000,



July 10, 2023 nü Gandhinagar nung External Affairs Minister, S. Jaishankar-i taruba Rajya Sabha by election nung tokteptsü atema nomination file asü dang tangokba noksa nung angur. Kasa noksa nung Gujarat Chief Minister Bhupendra Patel-a angur.

**Party nungja melentsütsü atema EC dak tashi mali: Uddhav Thackeray**

**Mumbai, July 10 (Agencies):** Hombarnü Shiv Sena (UBT) tongti lenir, Uddhav Thackeray-i, Election Commission (EC)-i party ka nem election temaitsü agütsütsü akok, ajisüaka party tenung melentsütsü atemabo parnok dak tashi mali, ta ashi.

Amaravati district nung jembidang, taoba mapang state Chief Minister, Uddhav-i, 'Shiv Sena' nungja ya tebou, Keshav Thackeray-i agütsüba nungja lir, anungji iba nungja ya shinga nem-a mauyadaksütsü, ta metetdaksü.

Tang Uddhav-i Maharashtra kübok Vidarbha region sema senzüdar.

Taküm February ita nung Election Commission-i Maharashtra Chief Minister Eknath Shinde-i aniba telok nem 'Shiv Sena' nungja den election temaitsü 'lasang' agüja liasü.

EC-isa Uddhav Thackeray-i aniba telok nem Shiv Sena (Uddhav Balasaheb Thackeray) nungja agütsü aser election temaitsü 'milen' agüja liasü.

2019 küm Maharashtra Assembly elections osang sangdongba sülen Uddhav Thackeray-i BJP den teloktep raksa aser NCP den Congress teyari agia sorkar tenteta liasü.

Ajisüaka yaküm June ita nung Eknath Shinde-i Thackeray anema apusoba

sülen Shinde-i BJP den lokteper sorkar aküm.

Hombarnü Uddhav Thackeray-i, "Party nungja melensütsü atema Election Commission dak tashi mali. Parnoki party ka nem election temaitsü dang agütsütsü akok," ta ashi.

Sangküm Lok Sabha election agütsü lia BJP anema tokteptsü atema opposition party kar longjemba dak sendakba nung tasü dangba ka langzü dang Uddhav-i, "Nibo iba dangji opposition party tem longjemba, ta majatsü ajisüaka asenok ajak linük meimertem lir aser ibaji democracy atema inyakba lir," ta ashi.

**Ato kilonser, Modi-i state balala nung tzümetsüng tensa asadang**

**New Delhi, July 10 (Agencies):** Hombarnü Ato kilonser, Narendra Modi-i minister tem aser ketdangsertem den jembia North India densema linük tesem balala nung tzüngluruwa mongpu ajanga lendong balala atalokba tensa asadangogo.

Prime Minister's Office (PMO) office-i twitter ajanga, "Ato kilonser Modi-i minister tem aser ketdangsertem den jembio aser India tesem balala nung tzünglu kanga aruba ajanga tataloktem metetpela-a tensa asadangogo. Tzümetsüng agi kongshirtem yaritsü atema local administrations, NDRF aser SDRF teams-i inyakdar," ta metetdaksü.

Tesüiba anogo ana tashi north India tesem aika nung tzünglu sashia aruba den mopung sashia onogo. Talisa Amongnü tzünglu sashia aruba den mopung tesashi ajanga ki aika bendokogo aser anentsüh lendong ataloka liasü.

Himachal Pradesh, Uttarakhand aser Jammu & Kashmir tamajungba kongshia anentsüh den tzümetsüng lendong balala nung nisung 17 süogo. Iba dak alia Uttar Pradesh, Punjab aser Rajasthan state tem nunga nisung pongu süogo.

Himachal Pradesh kübok Manali nungbo Beas ayong nung tzü tali mobanga ajungbena tzümetsüng tulu

aluba agi ki aser gari-a aoka ponger ao.

Himachal Pradesh kija nunga anentsüh lendong pezü nung nisung tenet asü aser ki ka chirepba lendong nung kibong ka nungi züngsem asem asü. Kullu aser Chamba nunga tzünglu dak sendakba lendong nung nisung ana süogo.

Himachal nung tesem 14 nung anentsüh sashia aluba den külemi tesem 13 nung tzümetsüng ajanga gari lenmang 700 jungnüa mokdang.

Iba dak alia north India tesem aika nung tzümetsüng ajanga Railway services anena liasü. Northern Railways-i train 17 thinen aser train 12 tanga lenmang ajanga senzüdaksü.

**July 13-14 anogotem nung Ato kilonser Modi-i France semdangtsü**

**New Delhi, July 10 (Agencies):** July 13-14 anogotem nung Ato kilonser, Narendra Modi-i France semdangtsü; iba mapang nungji France Tir, Emmanuel Macron-i Modi nungtem nung Paris nung aliba Louvre museum nung chiyung aser iba sentong nung adentsü atema nisung 200 dak tema jaoka lir.

Ato kilonser Narendra Modi France nung Bastille Day benjungmong sentong nung tetushi tejaoker asütsü atema jaoka liasü.

Modi-i tang agi pongubenbuba France semdangtsü. Pai Macron ajurua senden amentsü aser taküm France nung Namaste France festival nung shilem agir India nungertem ajurutsü.

Hokolbarnü Modi Bastille Day military parade nung adentsü, aser iba parade nung India nung contingent kati-

a shilem agütsü. India nung contingent nungji Indian Army Punjab Regiment nungi sepaitem, Indian Navy aser Indian Air Force nungi sepaitem alitsü.

India-i France dang nungi raraba Rafale tayimtsü 36 alizükba sülen nungi India aser France na tsüngda defence aser security tsütsü amaliatop jenjang tajungba kümogo.

Ano tanga osang ka nung, India-i France dang ano Rafale M naval jets 26 aser Scorpene submarines asem alizüktsü atema tezüngzüktep agütsü, ta metetdaksü.

Sen crore 90,000 agi jets aser subramines alizüktsü, aser iba osang ya Ato kilonseri France semdangba mapang nung official süa sangdongtsü.

Jets aser subramines alizüktsü atema defense procurement board (DPP)-i agizükogo.



New Delhi, July 10, 2023: Delhi tesem balala nung tzü metsüngba anema BJP-i AAP sorkar anema longkak aisdang police-i Delhi BJP Tir, Virendra Sachdeva puer aoba noksa nung angur.

**Tzümetsüng agi kongshiba states nem teyari agütsütsüla: Kharge**

**New Delhi, July 10 (Agencies):** Hombarnü Congress party Tir, Mallikarjun Kharge-i Centre sorkar dang Himachal Pradesh densema tzümetsüng agi kongshiba state tem nem PM CARES Fund nungi senotsü talila agütsütsüla, ta mepishiogo.

State balala nung anentsüh densema tzünglu dak sendakba lendong balala nung nisung 19 asüba sülen anogo ka lir Congress Tiri Himachal Pradesh Chief Minister, Sukhvinder Singh Sukhu den-a phone ajanga jembia liasü.

Kharge-i twitter ajanga, "North India nung tzünglu sashia aruba ajanga nisung aika asüba osang angashia jashir. Himachal Pradesh chief minister den jembio. State nung teyari agütsüba maparen tenzükogo aser tsüngsang-mopung mejungaka tzümetsüng agi kongshiba nüburtem tangaleni anientsü atema kanga meranga inyakdar," ta metetdaksü.

Paisa, State Disaster Response Force aser National Disaster Response Force team-i teyari agütsüba aser kümzükba maparen inyakdar aser takoksa angurtem nem senotsü teyari peria agütsütsü, ta metetdaksü.

"Central sorkar dang Himachal Pradesh aser tanga state tem nem PM Cares Fund nungi senotsü tali agütsütsü mepishir," ta Kharge-isa metetdaksü.

"Onoki Congress MLA ajak dang peipei tesem nung tzümetsüng agi kongshiba nüburtem akokba lenmang ajak agi yariang ta tuyuogo. Congress party nung inyaker ajak dang teyari agütsüba maparen nung yaritepang ta tuyuogo," ta paisa metetdaksü.

Himachal Pradesh nungbo Chandigarh-Manali National Highway densema gari lenmang 765 shibangogo aser state tesem balala nung nisung noklang aika pei aliba tesem nungi mouteti lir.



July 10, 2023 nü South Dinajpur district nung polling booth ka nung Panchayat election agishidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 11, 2023

### Long nungi AI

**A**senok Aortem ya long nungi poktet ta jembir. Ajisüaka, ano karibo aji magizüktetter, kechiyong nisung long nungi pokteta ta amangtsübaji, atangji, tasak. Kasaji, Laishiba dak mamangertemia nisung ya ali agi yanglu ta asüba dak mamanger, kechiyong nisung taküm ka ali agi yanglu ta asüba nung amangtsübajia, atangji, tasak. Ajisüaka, item ajak ya tongmelang aser tamang mapa ka dang lir, kechiyong item ajakji Tsüngremem mapa lir. Tsüngremi inyakba mapa ajak kodaser asenok Pai yanglubatemi angatetsü? Aji oda, tongmelang tamang agi, David chubai sarasadem dang Tsüngrem dang "naji kü long aser kü jenokdak" ta ashiba ama, asenokia long tetezüji Tsüngrem ta angatetra, atangji asenok ya Tsüngremi poktetdaksü ta angatetsü. Ajisüaka, asenoki Tsüngremi poktetdaksüba tesem alema asenok apokdak bushia ora tatem makatsü aser tanü asenok rongnung kin kidong bentetbenteta jayajakotsüsa aser kibalembutsüsa jateta aliba ya kong nungi koda jatetar mejangjaba –mejangjaba kümadoktsü. Atangji, asenok Khristan akümba agi asenok ya Tsüngremi ali agi nisung yangluba nungi tenzükner asütsüa akok, ajisüaka Eden tsüki nung asenok kin kidong jatetba otsübo mali, anungji asenok bentetsü merandang tebenja-ang tali benjatsü. Ibaji shisadanga asenoki asenok rongnung asenoksasa Chungliyimti otsü nungsa tangatetep kati arutetra, idangjiang asenok ajak long nungi jungjunga adoktetsü aser long nung jagi temoatsü agizüka agitettsü. Joko, alima aso 21 buba-a tom ka atonger aser alima nung mapa ajak nisung melen Artificial Intelligence (AI) ajanga inyaksü tenzükner. Aji oda, kaketreju nunga nisungi masü AI-i dang sayutsü aser tenla kidanga AI-i dang Tsüngrem o jembitsü ta asüba mapang agi asenok menepa arudagi. Ashiko, asenok yamai lia AI ji tongdaksüra asenok apokba lipok otsüa AI nemji dang shidaksütsüsa adoktsüa akok. Aji oda, nisunger tashitemetet shisatsü agi alima nungbo AI robot agidang nisung melena mapa ajak inyaksü aser nisungtembo ita petinu nung tua alitsü ta tebanger aritepdang, asenokbo long nung apok mapokba indang mebentettet jembia alitsübaji kanga takoksa asütsü. Atangji, pei apokba indang metetsübaji kanga tongtibang asünungji, asenok rongnunga asen lima terenlok indang jembitsüba dang nungibo mesüra nübertem asoshi mapa tajung inyaksütsü atema science & technology indang angazüksü agibo asenok long nungi apokba mapokba indang jembitsüang tejangraba aser süoki taoba bilema jembir. Ibaji asen yimtakbo nübertem ayangdaka maka aser chiyongsüa maka ta timtemer saka asenoki jangraba mapajibo yim süngküm aser yimkong senden alidak ki ka yanglutsüang jangrar ta asüba amato lir. Joko, tanü putu yabo kong nungi aru ta asüba jembitsüba putu masü saka kongi aotsü (?) ta jembitsüba putu lir. Tapu aika jembiyonga asenok ket nung nübo melira aser rongsen mekara tang aliba asenok yimsüngtem ya asenoki repranga lia tangari amokseptü. Ibai asenoki asenoksasa purateta yangluba lipoklisang nung taküm aliba putu masü aser tiyazü nütsüng yongsük dak nendaker aliba putua masü, asenok ya ochi putu ka agi menepa aruogo. Anungji, asenok renemtsüba mapaji asenok nem putu yimya agi bentsür aruba mapatem inyak metetsüla. Aji oda, AI agidang mapa ajak inyaksü süra joko asenoka AI inyakim indang jembitsüla, azüngtsüla aser metetsüla. AI jia nisungi yangluba dang lir, anungji asenok ya kong nungi apok ta bilemdangtsüba dang nungibo AI ya kodaser yanglutetsü aser kong koba nungdak atema amshitsü ta bilemba nung asenok mapang aser rongsen indoktsüla. Asenok ya ita petinu nung tua alitsü süra yangjibo kong nungi apok ta asüba otsüji menüngdaksü. Joko alima ya dang masü saka alima aser ita petinua yaa ka dang kümadoktsü. Aji oda, tanü yimti ka nungi kati orr aru ama asüng alima nungi itai tur alutsü. Iba ama mapang ka atema renemtsüba sentong nung long nungi apoker dang agitsü aser long nungi mapokertembo magitsü ta mali, shiba dak tashitemetet lir, shibai meranga aser nendaka inyaker aser shibai tasü itteter, pa mesüra laji dang nungdaksü. Itemjibo asüng AI lima nung tanü impusür impur dang nungi taoba asütsü.

## OLEMSABANG

### TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

#### Okila:

Tanü tensa lenisüba (leadership) aser lenir taküm indang shisadanga, pei indang aser pei asoshi dang bilemba aser inyakba lenirtem aser lenisüba agi sünga kümogo. Talisa iba ama tangatetba aser inyakim ya tanü libaliru yimya ka kümogo. Tanü putu nung pei peria alitsü tangatetba ajanga, lokti tenzükba lenir aser lenisüba nungi pei asoshi ang tenzükba lenir aser ibalibaliru tangatetba agi ang kümogo. Lenisüba ya meimchir lokti tentet ajunga nung kangasa tongtibang asünung tanu kaket balala aika adoka kaketnang sünga lir, aser seminar-tem balala agitepba agi süngoko. Aiben temejakshiba ka dang mejakshir saka alima melenshia aoba den abet lenisüba tangatetba tajung aika nung mangur. John Maxwell-i ashir, temelenshi adokdaksüba lenisüba jagi nüburtem anishir (influence), aser ibaji maneni ainer, anungji lenisüba jenjangjia maneni ainer. Pai maneni ashir, lenisüba takümji nüburtemi pa/la lenir ka asüba agi anidakba masü, mesura ozüng agi anidakba masü, saka odang nüburtemi pelashishia anidaknüba, ibaji chichiba lenisüba. Pai maneni ashir, lenisüba ya tangar madak tashi amshiba masu, saka tangar ka nem tashi agütsütetba dang melenshidaksüba lenisüba ta ajar. Lenisüba ya menden jenjang ka masü saka ibai tesendaktep lir. Lenisüba ya yimya ka (process), lokti nung lenisüba ajanga lokti ka anishidaksür (influence), aser iba jagi lokti alizüng tongdaksür. Jack Welch-i ashir, melenshidaksüba lenisüba yabo yimya- yimpong ka lir, iba yagi nisungtem taküm jenjangtem, temulungjang nung tebilembatem, libalirutem, aser tarutsü alizüngtem, item ajunga melenshidaksür. Melenshidaksüba lenisüba jagi talisa influence asür, kechiaser iba yagi tanidakertemi yimlaba dang nungi tali ajangzükdaksür. P.G. Northouse-i melenshidaksüba lenisüba indang maneni yamai ashir, melenshidaksüba lenisüba ajanga lenir aser tanidakertem kati ka ajungmesoa kati ka jaklaliru ajungketdaksür. Iba ama lenisüba yagi lenir kati tanidakertem taginübatem aser teimlabatem meteta parnok nükjidong ajangzükdaksütsü asoshi meranger aser yarir. Melenshidaksüba lenir ka jagi mangdang tajung lokti nung agütsüteter. Chichia nüburtemi pa/la dak temulung lemteter, kechiaser pa/la taküm aser mapa ajanga nüburtem nem tetezü tajung agütsür. Pa/lai nüburtem taginübatem, mangdang aser nükjidong angateter, aser yamaji nüburtem den putepba alitsü meranger. Item tangatetbatem dak ajemdaker Mosa taküm nungi temelenshi adokdaksüba lenisüba tangazüktsü kar bushidi. Aikati bilemtsü, Laishiba nung aliba par putu aser tanü asen putu khenyongi balala asü nung Laishiba nung aliba lenisüba tangatetba tanü asen asoshi kecha menüngdak. Saka kodang asenoki Laishiba Tsüngrem o jungjunga shisadangdir, alima yimsüsüba lenisüba menden asüyonga, tanelar wadang lenisüba menden asüyonga, alima aser tanülar wadang lenisütsü asoshi Laishiba nung tesayuba aser tutuyuba tajung aika angutsü.

#### Mosa Taküm

Mosa taküm nung meimlaba mapa ka agi pa taküm tenzükba asenoki Laishiba nung angur. Mosa tetsu shisa akaba ajanga Nile ayong nung molok ka nung Mosa taküm kümzük. Faroa jalai chubar jabaso asütsü asoshi mulungtet, anungji chubar shisaliok angazükdak tajungtiba nung tangazükba tajung Mosai angu. Mezüng pa taküm takatet nung ljiip nunger sobaliba aser par yimtem yimli tangatetba kübok aien. Yamaji tarutsü lenisüba mapa tulu asoshi Tsüngremi iba tia nung Mosa renemtsü. Pa yamaji chubar yimli kübok aser chuba taküm libaliru nung aliyonga par nüburtem kechi tia nung lir pai meteta liasü (Ani. 1:13).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# China nung ketdangsertemi Arogo lenirtem anema ken o benok



China nung House Church lenirtem- Li Jie, Han Xiaodong aser Wang Qiang nung angur.

**July 10, 2023:** China kübok Shanxi province nung Linfen Covenant House Church-i ozüing alema organization tentet aser ozüing alema yuan sen 780,000 bendenogo, ta tai tongloksü, ta Arogoi osang ka ajanga metetdaksü.

Yaodu District public prosecutors-i sayutsüingirtem-Li Jie, Han Xiaodong aser tena den külemi atongsema inyaker Wang Qiang nung anema tai tongloksü, ta UK nung amenoka aliba telok Christian Solidarity Worldwide (CSW)-i metetdaksü.

Li aser Han nati ozüing alema organization ka tentet aser Wang den külemi yimti nung ozüing alema inyakba mapa aika benshir; parnoki nisungtem dang ter shilem aser tenüngsang tenla agütsütsü

ajungshir, ta parnok nem tai tongloksü.

2022 küm August ita nung police-i Tenla ki mita aodang Li aser Han na pua liasü aser anogo asemnü pua ayu. Ajisüaka September 2022 nung ang tena official süa apu. Wang-a November nung mezüing khen apu aser December ita nung official süa apu.

Linfen police-i küm tesadang shi Arogo aser züingsemtem amokmerena aruogo aser Li kinüngtsü den tangar kata pua hopta aika ayuba sülen bail nung chioka liasü.

Linfen ketdangsertemi Arogo züingsemtem amokmerenyonga Li, Han aser Wang nung kinüngtsürtem (Wang kinüngtsü Wen Huijuan

aser Han kinüngtsü, Chen Ying, aser Wang kinüngtsü Jiang Rong) nungeri yimjak nung ocet balala ajanga parnok kinüngburtemi kecha aibelena mali, ta metetdaksü.

2018 küm February ita nung Regulations on Religious Affairs' ozüing yanglushiba sülen Li-i item ozüing anema külem sangdong ka nung sign süa liasü.

CSW tentetsang aser Tir, Mervyn Thomas-i, tiyazü nung Arogo lenirtem nem tai tongloksüba ya kanga tim masü; police-i kuli bendentsü atema lenirtem pua ayur aser reshikangshir, ta ashi.

Thomas-isa alima nung lokti tentet balala dang China nung register masüba tamangba lokti balala anema inyakba anentsü atema China sorkar rongshitsüla, ta mepishi.

# Dubai nung Arogo züingsemtemi pastor, Rev. Neil atema mangyimer



Rev. Dr. Neil Obeyesekere aser pa kinüngtsü Savitri Obeyesekere na tamalen tangokba noksa nung angur.

**Dubai, July 10, 2023 (Agencies):** Dubai nung aliba New Covenant Church züingsemtemi pastor, Rev. Dr. Neil Obeyesekere atema mangyimba den külemi asür nem akhüm agütsüogo.

Dr. Neil par linük, Sri Lanka-i mapang tatsüka atema oa amongba mapang nung ajungbena Mongolbarnü (July 4) temelungjang tashidak agi asü; pa arrshi küm 69 liasü.

Dr Obeyesekere kinüngtsü, Savitri Obeyesekere taküm March 24 nü asüba sülen ita asem shi dang lirbo pa-a süogo.

Par jala asem- Dhyneika Jayemanne, Tanika aser Shelomi Obeyesekere nungeri sangdong ka ajanga, "Pa ya asür Savitri Obeyesekere atema kinüngbu tajung ka liasü. Tena ajanga onok alima aru, onok dang taküm junga alitsü atema sayu aser onok nüngdak ajak perija onok nungita liasü. Tena pelaa alibaji onok atema teperi liasü. Tangbo tena tesem tajungba ka nung lir. Onoki tena kanga menungratsü," ta lemsatep.

Sri Lanka nung aliba Arogoi, "Pa leniba nung Dubai nung mezüingbuba charismatic Arogo amenok. Iba dak alia pai Sri Lanka nung Wow Life Church amenok aser tangbo alima tesem ajaklen lir. Rev. Dr. Neil-isa Apostolic Diocese of Ceylon (ADC) nung National Overseer inyak aser ADC Bible School nung tekolak liasü," ta metetdaksü.

Dubai nung aliba New Covenant Church nung külem tenzükertemi, Dr Obeyesekere küm 40 shi Dubai nung ali aser Holy Trinity Compound nung pa arrshi küm 65 tashi ali, ta metetdaksü.

Anna Walker-i, "Pa life coach teinyakdak liasü saka ozü Arogo nung tang tashi tekolak ama züingshia liasü. Khrista osangtajung prokba nung pa kinüngtsüi mapang ajak nung pa nungita liasü. Arogo nung temeshi kiyimba sentong aika ketdangsüa agitsüba atema onoki pa teti bilemtettsü," ta metetdaksü.

Jeffrey Walker-i,

"Tenaprongla chichiba lenirtem aser tesayurtem liasü. Nüburtem tenzüksü tena dak tejangraba tulu liasü. Iba ya onok atema senmang lir aser iba atemaji onoki teti tena dang pelatsü," ta metetdaksü.

Kasa Arogo nung pastor, John Besterwitch-i, "Dr. Neil Obeyesekere ya mangdang tajung aliba lenir ka liasü, ta nisung aikati züingshir. Tesüiba küm 30 dak tema Dr. Neil aser pa kinüngtsü Savi na leniba nung project aika inyak, reju aika amenok, Dubai aser Sri Lanka na nung mapatong aika tenzüka liasü. Dr. Neil ya life coach ka liasü, tesayur aser anepalur tajung ka liasü. Pa dak item sempet balala aliba ajanga nisung aika tangatetba melenshitsüogo aser taküm nung tazüokba liasü. Pai nüburtem kanga meim, külemi atongsema alitsü jangra aser pastoral care tajung agütsü," ta metetdaksü.

"Pai tangar junga angatetba aser nüburtem junga tenzüka ajanga counsellor tajung ka aküm. Pa dak sasa pela aser ajemalu aliba ajanga nisung aika taküm nung tesangwa agütsü. Dr. Neil Doctorates in Divinity degree ana liasü aser pai akhumket sempet aika nguogo. Kibong akümba sülen küm 36 tashi külemi lia arudang Dr. Neil aser Savi nati nüngdakbapurtem den shisa lemsatapa liasü," ta Kelcey Besterwitch-i metetdaksü.

Dr. Obeyesekere den tatemangbuba asüpila sentong Honibarnü (July 8) Sri Lanka kübok Borella nung agiogo.

# ANOGO ABEN TSÜNGREM DEN

## Tebenja Mangdang

- T. Ken 73: 1 - 12.

Iba lima nung asenoki kechi angur iba jagi shisabuludaktsü dang iba ken ya züing "Atangji Tsüngremi Israel dang ajunger, au, temulungsentsü merüka alir dang ajunger" ( t. 1). Asaphi Israel Tsüngrem dak amang aser taküm temerük alir Tsüngremi akhüm tsübur aser moatsür ta pai amang. Saka tekong ana nung pai pa tenük Tsüngrem nungi meyip, aser pa meketa alir tangar repringtsü tenzü. "Saka nibo, kü tetsüing talang ka oadoker liasü, kü jenjang ajujitsü anasa liasü. Kechiaser ni tamajung pur azükaru nung angudang, ni shisa makar dak tenük merem" ( t. 2,3).

Asenoki yangi Asaph tebilemtsü tongtipang ana angur. Mezüingbuba, pa mangdang nung langka tai liasü. Pai Tsüngrem dak mereprangi pa meketa alir tamajung pur dak repring. Itemji shirnok liasü? Pai itemji tekong 4 - 9 nungji rasaa ashir." Parnok asüba nung tekangshi mali: saka mebenshi" ( t. 4). Parnok meshiranger; parnoki tangar nem agütsütsü mali. Parnok timatemer, parnoki asüakümer aser azü tokshir. "Temo agi parnok tenük lungtetter temulung agi aginüba dak tali parnok kar" (t.7), au, parnok teraksa lir. Parnoki Tsüngrem anema jembir. " Sünga aliba aliba marok nungi parnoki tzü mesepzüker" ( t. 10). Asaph tzü tako jemya liasü. Pa mangdang nung tebenja liasü. Kodang asenoki tamang agi masü tanguba agi jajadir yamaji ataloker.

Tanabuba, pa tangatetba nung langka tai liasü. " Ni shisa makar dak tenük merema liasü" ( T. 3). Tsüngrem memeteter azükarur ta pai bilem asü ? Pa tangatetba melenshi asü? Ken zülur alima jenjang nung liasü, tarutsü aliba jenjang nung masü. Parnok " rongsen renlok" (t. 12)- saka kechi ama rongsen? Kodang ne tsüing ajujidir Tsüngrem indang aser Pa sorkar indang tasüngdangba adokdir, ne mangdang aser yimya repringshiang.

Tamang taküm ka alitsü asoshi Tsüngremi alima nung mapa inyakba angatettsü tenüngdaksü. Tanguba agi masü saka tamang agi jajatsüla. Ne tenük Kibuba dak yuang, aser alima yimya den hai-aura teka. Moatsütsü Tsüngrem tamang katetba lir. " Tsüngrem yimli aser Pa temeshiba tama bushiang, aser ajak Pai ne nem enloktsütsü" (Matt. 6:33).

# ABAM-i Arogo tem dang pelaba lemsateper

**Impur, July 10 (TYO):** asoshi iba sentong ya ajaki ABAM-i ayongzüka Imlong sakuku shilem agiogo, ta Place Mokochung Town pelaba office ajanga nung July 9, 2023 aonung 7:00

ako nungi 8:00 ako tashi asen kiyonger Manipur nung lendong adokba nung temulung kuremba aser aria bilemtsüba sayua koba "Candlelight Vigil: Prayer for Peace in Manipur" agiogo, iba nung shilem agir ajak dang pelaba lemsateper, ta ABAM Executive Secretary, Dr. Mar Pongener-i sangdong ka nung lemsatep.

Talisa iba sentong nung tsüingdong arua medentetaka, ABAM nung aliba Arogo 167 aser Fellowship 13 nung pei Arogo sasep sentong agiba

"Ano Mokochung temeket aliba Arogo tem, telen balala aser Administration dang sentong tiptema agia aobaji nenok ajaki shilem tulu agiba ajanga, ta nenok ajak dang pelaba lemsateper. Maneni MTBA dang sentong takok asoshi nüngdak ajak peritsüba atema pelaba lemsateper.

Tarutsü mapang nunga ano kodangsa nüngdakdir tang ama amalitepa Tsüngremer wadang inyaktsü tamang sarasadem ayur," ta kasa sangdong ajanga lemsatep.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Renrajok**

(n) au nungi nazükba renra tejok ( hard part of tinders)

\*Takar ki kibang nung **renrajok** alenloka ayur.

**Renshi**

(v) tajungba küma lepshi ( refinishing cut)

\* Ki asüdang tongnü jungjunga **renshir** azüung.

**OLONG PAITEP # 6572**

1			2		3		4		5
6		7							
					8				
9				10					
							11		
			12						13
	14							15	
					16				
			17						
								18	
19									

**TIPIEN**

- 2. Teburtemi tejok nung awaba - (8)
- 6. T \_\_\_ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

**LANGTSÜNGLEN**

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

**OLONG PAITEP # 6571 TELANGZÜBA**

**TIPIEN :**

- 1. Telok, 4. Aluru, 6. Ozüung,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

**LANGTSÜNGLEN :**

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

**NAI-A YA METETTER MA**

**YOUTUBE NUNG NÜBURTEMI TIMTIBA  
REPRANGBA VIDEO TEM:**

- 1. Baby shark dance:- Pinkfong (12.85 billion views).
- 2. Despacito:- Luis Fonsi feat. Daddy Yankee (8.16 billion views).
- 3. Johnny Johnny papa:- Loo-Loo kids (6.70 billion views).
- 4. Bath Song:- Cocomelon Nursery rhymes (6.20 billion views).
- 5. Shape of you:- Ed Sheeran (6.00 billion).
- 6. See you again:- Wiz Khalifa feat. Charlie Puth (5.89 billion views).
- 7. Phonic song with two words:- ChuChu TV (5.30 billion views).
- 8. Wheels in the bus:- Cocomelon Nursery rhymes (5.24 billion views).
- 9. Uptown Funk:- Mark Ronson feat. Bruno Mars (4.92 billion views).
- 10. Learning Colours:- MiroshkaTv (4.89 billion views).

Tanur asoba anogo nung salem osang den noksa angati adokdaksünüra - Tenüung, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

**Centre-i Mizoram nem Manipur IDPs atema teyari magütsür**



Manipur nungi internally displaced people (IDPs) kar Mizoram nung relief camp ka nung jenoka amongba angur.

**Aizawl, July 10, 2023**

**(Agencies):** Manipur nungi internally displaced people (IDPs) 12,300 tema nem teyari agütsütsü atema Centre-i Mizoram nem senotsü teyari kecha magütsü ta Home Minister Lalchamliaana-i ashi. "Mizoram sorkari Centre dang Manipur nung arua jenoka alirtem teyari agütsütsü atema Rs 10 crore meshi. Ajisüaka Centre-i Manipur nungi IDPs yaritsü atema humanitarian assistance ama Rs 10 crore magütsüetba atema sasar" ta Lalchamliaana-i ashi.

Chief Minister Zoramthanga-i Prime Minister Narendra Modi aser Union

Home Minister Amit Shah na dangi taküm May ita nung Rs.10 crore teyari meshia shidi zülü.

Ano, Tourism Minister Robert Romawia Royte-i anir Home Commissioner & Secretary H Lalenmawia dena ketdangsür telok kati taoba ita Delhi nung Union Home Secretary Ajay Kumar Bhalla den ajurutepa kasa onük jembia liasü.

"Union Home Secretary-i Delhi nung Royte aser tanga ketdangsürtem den senden amendang yaritsü ta nangzük, saka tanü tashi Centre nungi teyari kecha mangu mesüra osang kecha mali" ta Home minister-isa ashi.

Mizoram sorkari foreigners

atema masü saka India sensotem atema humanitarian assistance meshir, ta paisa ashi.

Lalchamliaana ya IDPs atema high-level panel chairman lir aser parnoki ministers, legislators, Central & state governments employees, state PSUs, commercial banks aser corporators dang nungi tenla meshir.

Manipur nungi nisung 12,344 tashi Mizoram nung jenoka lir ta Mizoram state Home department ajanga metetdaksüogo.

Nisung 12,344 nungi 2,884 tashi relief camps nung aser tanüngba 9,460 ji pei pei kinunger mesüra para kidang alir, ta ketdangsürtemisa ashi.

**TMC-i Sushmita Dev nem Rajya Sabha ticket magütsür**

**Guwahati, July 10, 2023**

**(Agencies):** Trinamool Congress (TMC)-i July 10 nü Rajya Sabha elections atema candidate 6 shimba osang metetdaksüogo saka parnoki Assam nungi Sushmita Dev meshim.

2021 nung Sushmita ya West Bengal nungi tetokteper shinga melii Rajya Sabha züngsem asütsü shima liasü.

Sushmita ya taoba All India Mahila Congress president liasü aser August 2021 nung lai Congress toktsür TMC nung aden.

Assam kübok Silchar nungi taoba MP Sushmita-i Congress toktsür West Bengal CM Mamata Banerjee'er telok nung

adenba sülen ita ka majungdang Trinamool Congress-i la Rajya Sabha züngsem asütsü shima liasü.

West Bengal nung Rajya Sabha election nung candidate 6 shimba nung Trinamool Congress spokesperson Gokhale dena lir. Pa ya sen tim mesüi amshiba ken o nung tai tonglokja lir.

Gokhale-i Centre nung BJP sorkar anema jembia aru aser tang pa bail nung chioka lir. Taküm January ita Enforcement Directorate (ED)-i Gokhale apu.

Maneni, TMC-i shimba candidate temji tang teinyakdak Rajya Sabya MP Derek O'Brien, Sukhendu Sekhar Ray,

Dola Sen, Samirul Islam aser Prakash Chik Baraik nunger lir.

2011 nungi Derek O'Brien ya TMC Rajya Sabha MP ama inyaka arur. Külen, Ray ya TMC deputy top whip lir aser 2012 küm Parliament nung mezüung atema züngemtsü shima liasü.

Sen ya union activist aser lennir ka lir aser pa ya 2017 nungi Rajya Sabha MP ka ama inyaka arur. Samirul Islam ya Bangla Sanskriti Mancha tanishisang lir aser TMC-i pa Rayja Sabha MP inyaksü shimogo. Tatemsa Prakash Chik Baraik ya Alipurduar nung TMC president lir aser pa-a TMC-i Rayja Sabha MP inyaksü shim.

**CM Conrad Sangma-i National Law University lapoktsü**

**Shillong, July 10, 2023**

**(Agencies):** Meghalaya Chief Minister Conrad K. Sangma-i Mayurbhanj Complex nung National Law University (NLU) indang temporary campus lapoktsüogo.

Iba sentong nung Chief Minister Sangma-i sobaliba aser lisapur ozüngtem documenting & codifying asütsü indang jembi.

NLU ya Northeast region ajunga atema center of excellence ka akümtsü mangdang ayur, ta pai ashi.

"NLU lapokba ajanga Meghalaya nung legal studies

aser research nung temelenshi tajung adoktsü. Tesüiba küm 50 tashi Meghalaya state nung teju shitak maliba ajanga legal system nung tayongzükba aika ajurua aruogo" ta CM Conrad-isa ashi.

"Sorkari Education Policy tasenba den liromedema aotsü saka iba atema mapang nüngdaksü" ta Conrad-isa ashi.

NLU nung Business Administration, Policy Research aser Data Sciences den law indang course agütsüba ajanga kaketshirtem kanga angazütsü, ta paisa shisem.

NLU indang data science course ya linük nung mezüngbuba lir. Iba ajanga lanurtemi skills aser solutions angazütsü, ta Meghalaya CM-isa metetdaksü.

Meghalaya sorkari temporary campus nung infrastructure atema Rs. 25 crore lezmüksü aser iba nungi Rs 19 crore amshiogo.

Iba sentong nung Meghalaya High Court Chief Justice Sanjib Banerjee, Education Minister Rakkam A Sangma aser University Vice Chancellor Prof Indrajit Dube nunger aden.

### West Africa bloc mendenpuba inyaksü Nigeria Tir Tinubu shimogo

**Abuja, Chiteeni/July 10 (Agencies):** West African regional bloc ECOWAS-i par lokti tentet mendenpuba asütsü atema Nigeria Tir Bola Tinubu shimogo.

West Africa nung tang military-i sorkar atsüngba aser telungpurtemi timtem agütsüba ajanga mepetmesü adoker aliba mapang ka nung tang pa shimogo.

2020 küm nungi tang tashi nung West Africa nung military-i sorkar trok atsüngba ajangshiogo, aser iba ajanga iba tesem nung democracy atsüngzüka aoba sayur.

Guinea-Bissau nunga military-i sorkar atsüngtsü merangdanga

liasü aser iba linük Tir Umaro Sissoco Embalo-i Deobarnü vote agiba sülen Tinubu nem bloc indang mendenbuba mapa belenzüktsüogo.

Nigeria tir-i, security tsütsü tetsükdaksü adoker aliba aser coup tem anema takaratiba nung jenjang agitsü ayongzükogo, koba pai ashiba agi, tesensentsüka kümogo.

"Yimjung aser security dak sendakba nung tensa kanga mejungi kümogo aser item tetsükdaksütem ya agintsü atema takaratiba nung jenjang agitsü nüngdaker. Iba dak sendakba nung security tsütsü mepetmesü adoker aliba ya

bentettsü asoshi asenok ket nung aliba regional frameworks ajak amshitsü asoshi asenok bendanga agütsütsüla," ta pai Hombarnü sangdong ka ajanga metetdaksü.

Tinubu-i, yimden yimsüsüba tsütsü tamendakdak akangshitsü, yimjung aser security aser regional economic integration atema awawa inyaksü tenangzükba agüja liasü.

Iba bloc mendenbuba mapa ya küm ka atema abener aser züngsem 16-i melentepa abener. Economic Community of West African States (ECOWAS) ya linük 16-i kümetta lokti tentet ka lir.

### China kindergarten nung nisung trok kotari agi tsüngset

**Lianjiang, Chiteni/July 10 (Agencies):** China south-east tsütsü Guangdong province nung aliba kindergarten ka nung kotari agi tanur asem densema nisung trok tsüngset.

Police-i ashiba agi, parnoki Lianjiang nung arishi küm 25 tain Wu pua lir. Asürtem rongnung tesayur ka aser tsürabor ana lir, aser ka yiru, ta yangji aliba ketdangsur temi ashi.

Police temi ibai asaa inyakba mapa ka lir ta ashi saka kechi tebilemba nung inyakar mashi.

Iba lendong ya Hombarnep 7:40 ako meta tsürabor temi tanurtem summer classes atema anioktsüba mapang ataloka liasü. Nisungba ya anepdang 8:00 ako meta apu.

Iba kindergarten temeket tesem ajak shibangogo, ta iba anasa store kibur kati ashi.

Lianjiang nungya nütsüng yongsük million 1.87 shi lir.

Iba lendong atalokba indang video tem China nung social media nung prokshia nürburtem ain adoktep aser aoksatepa liasü.

China nung prangbong amshitsü nokdanga lir saka küm ishika kotari agi lendong agütsüba

aiben ajangshia arur, aser ano khen lendong agütsür kati tanur 50 aliba classroom ka nung chemical khalokja tanurtem yirua liasü.

2010 küm nungi tang tashinung China kübok schools, colleges aser universities nung kotari agi lendong 17 ben agütsüba BBC ajanga züngteta lir. Tatalokba ter 2018 aser 2023 tsüngta ataloka liasü.

Taoba küm August ita kotari bena alir ka south-eastern Jiangxi province kübok kindergarten kati aita nisung asem tepset aser trok yiruja liasü.

2021 küm April ita Guangxi Zhuang autonomous region kübok Beiliu City nung kotari agi tapi agi nisungtem dak tsünga aodang tanur ana asü aser 16 yirua liasü.

South-west China nung Chongqing nung aliba kindergarten nung October 2018 nung kotari agi tanur 14 yirutsü.

Item tatalokba nung lendong agütsürtem ya timba tebur lir aser nürburtem dang tejashi aliba lemsatepa liasü.

US nungi Japan tashi danga linüktem nunga iba ama lendong

atalokba angur. Saka China nung iba ama lendong tali atalokba yabo ano kuli kar alitsü akok, ta mongin temi ashir.

COVID-19 pandemic mechi China nung yimtem nung tenokdangba talangtiba aser tesashitiba benokba ama alima nung danga tesemtem nung majangshi, aser iba yongji yamai inyaker alitsü südi, ta parnoki amanger. Iba lockdown sülen nürburtem dak kongshiba junga mangatet saka tejashi, mapa nungi anenba, investment aser tesendaktep nung takoksa ajurubatemala alitsü akok.

Lanur mapa mangur onsara akumba aser takar-sensaker telemsa tulu aliba ajanga asütsü akok, ta ashir.

2010 küm nungi China ketdangsur temi school temeket nung security akangshir. Iba küm Ministry of Public Security ajanga tesem balala nung ketdangsurtem dang tesayur aser kaketshir kumzüka ayutsü asoshi mera agitsü ajungshia liasü.

April 2021 lendong sülen education ministry ajanga school ajak nung emergency evacuation drills agitsü metetdakja liasü.

### Sür küm 2 ajungba menungra bilemteter Asür Mrs. Chubala Yaden

Pongmang ka amai dang bilemer saka asangsang nung nai onok toktsür or tanü agi küm 2 apensar, saka onok mulungjang nung na teti alir.

Nü temeim mapatem, nü sayu o tajung, nü tamang sarasadem, akümüli peyong kangki leman nung jajaba item bilemtetdang onok mulung süngzüker.

Tanü na onok den meliaka asenok ajak künü anogo kodak nung ajurutsü.



TASÜBA ANOGO : 11/07/2021

~ Temeim Kinungbo, Chirnurtem, Semchirtem, Amolatem, Kinungertem.

### TENÜNGSANG AGÜTSÜR



Basketball Federation of India (BFI) nung Executive Committee Member ama shimba atema Sentiningsang Longkumer nem Dimapur Changki Lanuri Longjem (DCLL) ajanga tenüngsang agütsür.

Nagaland nungi iba jenjang tongtetba pa mezüng alitsü. Nü wadang ajak nung Tulusang Tsüngremi maneni moajangma.

Sd/-  
Limatemu  
President, DCLL

Sd/-  
Rejosanen  
Gen. Secretary, DCLL

### Office of the MEYILONG VILLAGE COUNCIL

#### KONANG TETUSHI AGÜTSÜR

Sb. Yangersenba T. Jamir, S/o Wb. Toshilemba aser Wt. Takolemla, NPSC tatitang nung temaba jenjang nung Lecturer in Mathematics (Under Technical Education) ngutetba asoshi tenüngsang agütsür.

Tsüngremi tarutsü wadang ajak nung maneni moajangma.

Sd/-  
Wb. Butishiba  
Chairman

Sd/-  
Wb. Limasunep  
Secretary



# WORLD POPULATION DAY 11<sup>TH</sup> JULY 2023



**OMEN**  
"AZADI KA AMRIT MOHATSAV NÜNGTEM NUNG, ASENOKI PELA ASER YIMCHIYIMJUNG NUNG ALITSÜ ASOSHI FAMILY PLANNING AMSHITSÜ ZÜNGZÜKTI"



TETSÜ ASER TANUR TEMANG ANEMA ALITSÜ ASOSHI TANUR ANA TSÜNGDA TAWA (KÜM 2-3) PERIA YUDI.



NER KIBONG ATEMA SENTONG YANGLUANG, ARISHI KÜM SHIDAK NUNG KIBONG KUMANG.



FAMILY PLANNING PROCEDURE, TALISA POST-PARTUM MESÜRA POST ABORTION AMSHIDI.

## AVAIL FREE

FAMILY PLANNING FORTNIGHT 11<sup>TH</sup> - 24<sup>TH</sup> JULY 2023 MAPANG STATE TESEM AJUNGALAN GOVERNMENT HOSPITAL NUNGI FAMILY PLANNING SERVICE ITEMI AGIDI -

- Permanent Family planning methods (Tebur atema Vasectomy aser Tetsür atema Tubectomy)
- Temporary Family planning methods (Copper-T, Condom, Oral Contraceptive, PPIUCD, IUCD-380A & 375)
- Injectable Contraceptive : Compensation dener District Hospitals ajak nung angütsü.

#### COMPENSATION YAMAI ANGÜTSÜ

- ₹ 2000/- TUBECTOMY (Interval & Post Abortion)
- ₹ 3000/- POST-PARTUM STERILISATION
- ₹ 300/- PPIUCD & PAIUCD shia
- ₹ 3000/- VASECTOMY atema
- Compensation ya Accredited Private/ NGO Facilities nunga angütsü.

## Mohun Bagan Super Giant-i India defender Anwar Ali alizükogo

**Chiteni/July 9, 2023 (Agencies):** Mohun Bagan Super Giant-i Deobarnü sangdong ka ajanga India national team nungi defender Anwar Ali alizükba metetdaksüogo.

Indian Super League tesisabuba koker aliba team yagi parnok indang official Twitter handle ajanga Anwar alizükba metetdaksü ajiüsüaka pa den tenangzüktepba yangluba indang osang tejangja magütsü.

Tweet den külemi parnoki Punjab nungi arishi küm 22 tain asayar taküm nung timtem ajangshibatem indang video ka lemsatepa liasü. Anwar ya 2017 küm U-17 World Cup nung India tenung nungi asayaba sülen küm ana lir pa dak temlungjang tashidak tapu balaka keta aliba poteta liasü.

Iba sülen national federation (AIFF)-i Anwar nem tenokdangba agütsü aser ibayongji okadak ken o benoka raratsüsa aküm aser pa 2021

küm Durand Cup nungi asaya tenzük.

2021 küm Ali, Delhi FC nungi Durand Cup nung aser I-League Qualifiers nung asaya liasü, kong pa par team nungi goal timtiba indaktsüba asayar liasü aser iba ajanga pa ISL nung FC Goa nungi asayatsü asoshi maongka angu kong pa ita 15 asayaogo.

"Asayartem ajaki Kolkata nung asayaner. Tanur asüdag nungi ni idaki asayanüa liasü," ta Anwar-i ashi.

"Mohun Bagan ya India nung club tejentiba lir aser parnok puti otsü aika lir. Ni iba team nungi asayatsü matateter.

"Osang sangdongba sülen Mohun Bagan pusemertemi kü dangi message aika yokdar aser iba ya ni atema tajungtiba asayatsü asoshi tajungshiba ka asütsü," ta pai ashi.

Centre-back nung asayasang yagi tawa tembangba SAFF Championship nunga kanga

junga asayaogo aser pa iba club nung Armand Sadiku, Brendan Hamill aser Florentin Pogba nung den külemi asayatsü.

Maneni club nung defender tem rongnung ano India nung Subhasish Bose aser Pritam Kotal nata densema lir.

"Ni ano tangazüksü aika lir. Team nung nungtugu asayar aika lir asünung iba maongka ya takokba tashi amshitsü ni yongya atar. Ni tang tashi ISL khen danga koka mali anungji Mohun Bagan nung asayaba mapang iba asayamung koka kü nükjidong tongtetsü imla atar. Maneni ni Kolkata derby nung asayatsü aser taruba AFC Cup nung asayatsü atema yongya atar," ta paisa shisem.

Mihun Bagan puri season tasenba metenzük tsünda India nung international asayar Anirudh Thapa, Sadiku na aser Australia nung international asayar aser A-League akokba team nungi forward Jason Cumings nungera alizükogo.

## Lakshya Sen-i Canada Open 2023 kokogo



**Chiteni/July 10, 2023 (Agencies):** Calgary nung

China nung asayar Li Shi Feng akokba sülen Lakshya Sen-i Canada Open 2023 kokogo. Commonwealth Games nung gold medal ngur aliba India nung asayar yagi final nung All England champion Feng ya 21-18, 22-20 agi straight game nung koka liasü.

"Olympic qualification atema asayaba küm ni asayanüba ama masayatetba ya tasak liasü. Anungji iba asayamung akokba ajanga kü sasa dak tali temlung lemteta kümdaktsütsü," ta Sen-i asaya akokba sülen PTI dang ashi.

"Ni asaya kar nungbo kanga meranga asayatsüsa aküm, kechiyong iba tesem nung asayatsüba ya balaka aser yimya süpa asayatsü kanga tongtibang liasü," ta paisa shisem.

Final nung asayar ana tsünga rally talangla asaya aser net nung shuttle kang kara zütepa asaya liasü, ajiüsüaka tena rongnung Sen-i tajungba asayatet tena tsünga tenet ben asayaba Sen-i pongubenbuba koktetogo.

Sen ya taoba mapang World No. 6 asayar liasü aser pai 2021 World Championships nunga bronze medal nguogo, ajiüsüaka pa taoba küm August ita World Championships sülen teni sürgery agiba ajanga asaya nung tetsükdaktsü adoka aruogo.

Final nung asayar anapronglai kanga junga asayaogo saka Sen-i asaya

tajungba angateta aziüoka asayaba ajanga takok ngutetogo.

Asaya nung Sen-i line nung aser cross-court smash tem züklokja Li Shi Feng nem timtem agütsü aser mezüngbuba game nung pa 2-6 agi tejakdang aküm.

Tena kanga kara asayatep aser iba den smash tesashi kar züklokja asayatepogo. Asaya nung Li-i 390kmph smash ana zükloktsü aser Sen-ia 400 kmph smash ka ana züllokja liasü.

Break tashi nung Sen point asem agi Li dang nungu timba liasü. Asayar anapronglai court tesülen nungi smash tesashi kar züklokja asayatep saka aibelen kanga menaba ajanga Li-i 12-15 agi tesülen aküm. Ajiüsüaka pai asendenshir junga asaya 15-15 aküm saka Sen-i maneni kanga junga asaya mezüngbuba game 21-18 agi akok.

Tanabuba set nunga asayar anapronglai maneni kanga junga asaya-a rally talangla asaya aser asaya tetenzüklen tena point 5-5 liasü ajiüsüaka break tashi nung Sen point 4 agi tejakdang liasü.

Net nung Li-i tajungba asayateta liasü aser Sen-i pa asayaba yimya melenshia asaya-a 13-14 agi pa tejakdang aküm. Ajiüsüaka China nung asayar ya tejakdang aküm aser game points pezü angu. Ajiüsüaka Sen-i süngjemshir asaya-a score kasasa aküm.

Point 20-20 ta aliba mapang Sen-i maneni kanga junga asaya-a point ana atonga angu aser asaya koka liasü.

## 45th Inter District & State Open Badminton Championship tenzükogo



**Dimapur, Chiteni/July 10 (TYO):** Li Ning 45buba Inter District & State Open Badminton Championship 2023 aser Nagaland Badminton Association Hon Jubilee amungba mezüngbuba sentong Nagaland Legislative Assembly stadium nung July 10 nü agiogo, kong Sharingain Longkumer Speaker, Nagaland Legislative Assembly alakteta jaoker liasü.

Sentong nung o jembiba mapang Sharingain-i, India nung badminton asaya renlokyonga aoba aser koda alima nung asayar tajungtibatem anitetogo, iba indang lemsatep. "Asenoki district süang, state süang mezüra national international süa item jenjang ajak nung asayartem anitetsü nungdaker. Asayartem tanur asüdag nungi parnok sempet jangja anitetsü aser tenüngdakba skill tem sayutsü NBA khuret lir," ta pai ashi.

Paisa, Association küm 50 tashi takok ma nung anir aruba atema NBA aser iba lokti tentetertem nem tenüngsang agütsü. Maneni pai asayamung nung shilem agiba lanur

asayartem dang, ajak dang tongtibangibaji asayartem parnok ya lir; asayartem pei tekelok shisatsü train asütsüla aser iba den temang anema alitsü asoshi inyaksangshitsü, skill bendenloktsü aser ajak dang tongtibangtiba pei yimayimpong aziüoka alitsüla, teti kasa junga asayatsü asoshi merangtsüla, kechiyong coach aser trainer temi parnok dang skill aser sabang dang agütsütsü ta ashi. Tanübo sorkari saisapong sector ajungkettsü atema rangloker inyakdar ta paisa shisem. Sentong tetenzüklen pai Golden Jubilee Souvenir aser NBA website sayaja liasü.

Kasa mapang nung NBA tir Kesonyu Yhome-i, Nagaland sorkar dangi parnoki onük ana bendangba lemsatepa liasü. Mezüngbuba nung Kohima nung indoor badminton stadium bensa-a tenüngdangba services aser amenities ajak keter state-of-the-art facility ka yanglutsü bendangogo, kong international asayamungtem densema tongtibang asayamungtem ayongzükba asayatetsü.

Jenjang balala nung training

aser coaching camp maneni ayongzükba agiaka state nung badminton asaya bangdaker dang lir aser iba asaya merenlokba kuli kaji taküm libaliro asoshi jenjang ajungkettsü atema asayaba ajanga kecha lenmang melapoktsüba ajanga lir, ta pai ashi. Iba dak sendakba nung NBA-i group 'C' category nung takok tajung anguba asayartem atema mapa shilem 5 mekazükba toktsütsü atema policy ka NBA-i benokdangogo, ta pai shisem.

Sentong nungsa DC & DSC Kohima Chairperson Shanavas C-i lokti pela agizükba o jembiba mapang Naga nungertemi badminton asaya koda meimer iba indang lemsatepba den saisapong balala nung tetsükdaktsü balala alibatem indang lemsatep aser koda badminton asaya nung item tetsükdaktsütem ajangtata linük asoshi international asayartem kar anitetba indang shisema liasü.

Iba sentong ya NBA organizing Secretary Kekhriesetuo Ziephru lenisüba nung agi aser Mengu Suokhrie-i ken tajung ka tena liasü.

## BILEMDANGANG

"Nai komaka meranga inyakdir yamaji na tia takaba akümer."